

摛藻堂四庫全書薈要

史部

欽定四庫全書叢書要

史部

唐書卷二百十六上

下



詳校官內閣侍讀臣孫球

欽定四庫全書

唐書卷二百十六上

史部

宋 端 明 殿 學 士 宋 福 撰

列傳第一百四十一上

吐蕃

吐蕃本西羌屬蓋百有五十種散處河湟江岷間有發  
羌唐旄等然未始與中國通居折支水西祖曰鶻提勃  
悉野健武多智稍并諸羌據其地蕃發聲近故其子孫

曰吐蕃而姓勃窣野或曰南涼禿髮利鹿孤之後二子  
曰樊尼曰傉檀傉檀嗣為乞佛熾盤所滅樊尼挈殘部  
臣沮渠蒙遜以為臨松太守蒙遜滅樊尼率兵西濟河  
逾積石遂撫有羣羌云其俗謂彊雄曰贊丈夫曰普故  
號君長曰贊普贊普妻曰末蒙其官有大相曰論薩副  
相曰論薩扈莽各一人亦號大論小論都護一人曰悉  
編制掣逋又有內大相曰曩論掣逋亦曰論莽熟副相曰  
曩論覓零逋小相曰曩論充各一人又有整事大相曰  
曩論覓零逋

喻寒波制通副整事曰喻寒覓零通小整事曰喻寒波  
充皆任國事總號曰尚論制通突瞿地直京師西八千  
里距鄯善五百里勝兵數十萬國多霆電風雹積雪盛  
夏如中國春時山谷常冰地有寒蠻中人輒瘡促而不  
害其贊普居跋布川或遷娑川有城郭廬舍不肯處聳  
毳帳以居號大拂廬容數百人其衛候嚴而牙甚隘部  
人處小拂廬多老壽至百餘歲者衣率檀革以赭塗面  
為好婦人辮髮而縈之其器屈木而革底或檀為槃凝

必為盜寶羹酪并食之手捧酒漿以飲其官之章飾最  
上瑟瑟金次之金塗銀又次之銀次之最下至銅止差  
大小綴臂前以辨貴賤屋皆平上高至數丈其稼有小  
麥青麌麥蕎麥豐豆其獸犛牛名馬犬羊彘天鼠之皮  
可為裘獨峯馳日馳千里其寶金銀錫銅其死葬為冢  
既塗之其吏治無文字結繩齒木為約其刑雖小罪必  
抉目或刖劓以皮為鞭撻之從喜怒無常算其獄窟地  
深數丈內囚于中二三歲乃出其宴大賓客必驅犛牛

使客自射乃敢饋其俗重鬼右巫事類瓶為大神喜浮屠法習呪詛國之政事必以桑門參決多佩弓刀飲酒不得及亂婦人無及政貴壯賤弱母拜子子倨父出入前少而後老重兵死以累世戰沒為甲門敗懦者垂狐尾於首示辱不得列于人拜必手据地為犬號再揖身止居父母喪斷髮黛面墨衣既葬而吉其舉兵以七寸金箭為契百里一驛有急兵驛人臆前加銀鶻甚急鶻益多告寇舉烽其畜牧逐水草無常所其鎧胄精良衣

之周身竅兩目勁弓利刃不能甚傷其兵法嚴而師無  
餽糧以鹵獲為資每戰前隊盡死後隊乃進其四時以  
麥熟為歲首其戲棋六博其樂吹螺擊鼓其君臣自為  
友五六人曰共命君死皆自殺以殉所服玩乘馬皆瘞  
起大屋冢顛樹衆木為祠所贊普與其臣歲一小盟用  
羊犬猴為牲三歲一大盟夜有諸壇用人馬牛驢為牲  
凡牲必折足裂腸陳于前使巫告神曰渝盟者有如牲  
其後有君長曰瘕悉董摩董摩生陀土度陀土生揭利

失若揭利生勃弄若勃弄生詎素若詎素生論贊素論  
贊生棄宗弄贊亦名棄蕪農亦號弗夜氏其為人慷慨  
才雄常驅野馬犧牛馳刺之以為樂西域諸國共臣之  
太宗貞觀八年始遣使者來朝帝遣行人馮德遐下書  
臨撫弄贊聞突厥吐谷渾竝得尚公主乃遣使齎幣求  
昏帝不許使者還妄語曰天子遇我厚幾得公主會吐  
谷渾王入朝遂不許殆有以間我乎弄贊怒率羊同共  
擊吐谷渾吐谷渾不能亢走青海之陰盡取其貲畜又

攻党項白蘭羌破之勒兵二十萬入寇松州命使者貢  
金甲具言迎公主謂左右曰公主不至我且深入都督  
韓威輕出覘賊反為所敗屬羌大擾皆叛以應賊乃詔  
吏部尚書侯君集為行軍大總管出當彌道右領軍大  
將軍執失思力出自蘭道右武衛大將軍牛進達出闊  
水道又領軍將軍劉蘭出洮河道並為行軍總管率步  
騎五萬進討進達自松州夜麌其營斬首千級初東寇  
也連歲不解其大臣請返國不聽自殺者八人至是弄

贊始懼引而去以使者來謝罪固請昏許之遣大論薛  
祿東贊獻黃金五千兩它寶稱是以為聘十五年妻以  
宗女文成公主詔江夏王道宗持節護送築館河源王  
之國弄贊率兵次柏海親迎見道宗執婿禮恭甚見中  
國服飾之美縮縮媿沮歸國自以其先未有昏帝女者  
乃為公主築一城以夸後世遂立宮室以居公主惡國  
人赭面弄贊下令國中禁之自褫檀罽襲紈絝為華風  
遺諸豪子弟入國學習詩書又請儒者典書疏帝伐遼

還使祿東贊上書曰陛下平定四方日月所照竝臣治之高麗恃遠弗率於禮天子自將度遼寧城陷陳指日凱旋雖鴈飛于天無是之速夫鵝猶鴈也臣謹治黃金為鵝以獻其高七尺中實酒三斛二十二年右衛率府長史王玄策使西域為中天竺所鈔弄贊發精兵從玄策討破之來獻俘高宗即位擢駙馬都尉西海郡王弄贊以書詒長孫無忌曰天子初即位下有不忠者願勒兵赴國共討之并獻金琲十五種以薦昭陵進封賓王

賜餉蕃渥又請贊種酒人與碾磧等諸工詔許永徽初  
死遣使者弔祠無子立其孫幼不事故祿東贊相其國  
顯慶三年獻金盞金頗羅等復請昏未幾吐谷渾內附  
祿東贊怨忿率銳兵擊之而吐谷渾大臣素和貴奔吐  
蕃甚以虛實故吐蕃能破其國慕容諾曷鉢與弘化公  
主引殘落走涼州詔涼州都督鄭仁泰為青海道行軍  
大總管率將軍獨孤卿雲等屯涼鄯左武候大將軍蘇  
定方為安集大使為諸將節度以定其亂吐蕃使論仲

琮入朝表吐谷渾罪帝遣使者誰讓乃使來請與吐谷渾平憾求赤水地牧馬不許會祿東贊死東贊不知書而性明毅用兵有節制吐蕃倚之遂為彊國始入朝占對合旨太宗擢拜右衛大將軍以琅邪公主外孫妻之祿東贊自言先臣為聘婦不敢奉詔且贊普未謁公主陪臣敢辭帝異其言然欲懷以恩不聽也有子曰欽陵曰贊婆曰悉多于曰勃論祿東贊死而兄弟並當國自是歲入邊盡破有諸羌羈縻十二州總章中議徙吐谷

渾部于涼州旁南山帝刈吐蕃之入召宰相姜恪閣立  
本將軍契苾何力等議先擊吐蕃立本曰民饑未可以  
師何力曰吐蕃介在西極臣恐師到獸竄山伏捕討無  
所得至春復侵吐谷渾臣請勿救使疑吾力困而驕之  
一舉可滅也恪曰不然吐谷渾方衰吐蕃負勝以衰氣  
拒勝兵戰必不亢不救則滅臣謂王師亟助之使國幸  
存後且徐圖可也議不決亦不克徙咸亨元年入殘羈  
縻十八州率于闐取龜茲撥換城於是安西四鎮竝廢

詔右威衛大將軍薛仁貴為瀋沙道行軍大總管左衛  
員外大將軍阿史那道真左衛將軍郭待封副之出討  
吐蕃并護吐谷渾還國師凡十餘萬至大非川為欽陵  
所拒王師敗績遂滅吐谷渾而盡有其地詔司戎太常  
伯同東西臺三品姜恪為涼州道行軍大總管出討會  
恪卒班師吐蕃遣大臣仲琮入朝仲琮少游太學頗知  
書帝召見問曰贊普孰與其祖賢對曰勇果善斷不逮  
也然勤以治國下無敢欺令主也且吐蕃居寒露之野

物產寡薄烏海之陰盛夏積雪暑既冬裘隨水草以牧  
寒則城處施廬帳器用不當中國萬分一但上下一力  
議事自下因人所利而行是能久而彊也帝曰吐谷渾  
與吐蕃本甥舅國素和貴叛其主吐蕃任之奪其土地  
薛仁貴等往定慕容氏又伏擊之而寇我涼州何邪仲  
琮頓首曰臣奉命來獻它非所聞帝贊其答然以仲琮  
非用事臣故殺其禮上元二年遣大臣論吐渾彌來請  
和且求與吐谷渾脩好帝不聰明年攻鄯廓河芳四州

殺略吏及馬牛萬計乃詔周王顯為洮州道行軍元帥率工部尚書劉審禮等十二總管以相王輪為涼州道行軍元帥率左衛大將軍契苾何力鴻臚卿蕭嗣業等軍討之二王不克行吐蕃進攻疊州破密恭丹嶺二縣又攻扶州敗守將乃高選尚書左僕射劉仁軌為洮河鎮守使久之無功吐蕃與西突厥連兵攻安西復命中書令李敬玄為洮河道行軍大總管西河鎮撫大使鄯州都督代仁軌下詔募猛士毋限籍役痕負帝自臨遣

又敕益州長史李孝逸、嘉州都督拓王奉益發劒南山  
南士先戰龍支吐蕃敗敬彥率劉審禮擊吐蕃青海上  
審禮戰沒敬彥頓承風嶺礙險不得縱吐蕃壓王師屯  
左領軍將軍黑齒常之率死士五百夜斧其營虜敬彥  
相轄藉而死者甚衆乃引去敬彥僅脫帝既懦仁無遠  
略見諸將數敗乃博咨近臣求所以禦之之術帝曰朕  
未始擐甲履軍往者滅高麗百濟比歲用師中國騷然  
朕至今悔之今吐蕃內侵盍為我謀中書舍人劉禕之

等具對須家給人足可擊也或言賊險黠不可與和或  
言營田嚴守便惟中書侍郎薛元超謂縱敵生患不如  
料兵擊之帝顧黃門侍郎來恒曰自李勣亡遂無善將  
恒即言向洮河兵足以制敵但諸將不用命故無功帝  
殊不悟因罷議儀鳳四年贊普死子器弩悉弄立欽陵  
復擅政使大臣來告喪帝遣使者往會葬明年贊婆素  
和貴率兵三萬攻河源屯良非川敬玄與戰湟川敗績  
左武衛將軍黑齒常之以精騎三千夜擣其營贊婆素

引去遂擢常之為河源軍經略大使乃嚴烽邏開屯田  
虜謀稍折初劍南度茂州之西築安戎城以迮其鄙俄  
為生羌導虜取之以守因并西洱河諸蠻盡臣羌同黨  
項諸羌其地東與涼松茂雋接南極波多羅門西取四鎮北  
抵突厥幅員餘萬里漢魏諸戎所無也永隆元年文成  
公主薨遣使者弔祠又歸我陳行焉之喪初行焉使虜  
論欽陵欲拜已臨以兵不為屈留之十年及是喪還贈  
睦州刺史贊婆復入良非川常之擊走之武后時與蠻

夷同朝賀永昌元年詔文昌右相韋待價為安息道大  
總管安西大都護閻溫古副之以討吐蕃兵逗留坐死  
徙明年復詔文昌右相岑長倩為武威道行軍大總管  
討之兵半道罷又明年大首領曷蘇率貴川部與党項  
種三十萬降后以右玉鈐衛將軍張玄遇為安撫使率  
兵二萬迎之次大度水吐蕃禽曷蘇去而它酋昝挿又  
率羌蠻八千自來玄遇即其部置葉州用昝挿為刺史  
刻石大度山以紀功是歲又詔右鷹揚衛將軍王孝傑

為武威道行軍總管率西州都督唐休環左武衛大將  
軍阿史那忠節擊吐蕃大破其衆復取四鎮更置安西  
都護府於龜茲以兵鎮守議者請廢四鎮勿有也右史  
崔融獻議曰戎狄為中國患尚矣五帝三王所不臣漢  
以百萬衆困平城其後武帝赫然發憤甘心四夷張騫  
始通西域列四郡據兩闕斷匈奴右臂稍稍度河湟築  
今居以絕南羌於是障候亭燧出長城數千里傾府庫  
殫士馬行人使者歲月不絕至作皮幣算緝法稅舟車

榷酒酤夫豈不懷為長久計然也匈奴於是孤特遠竄  
遂開西域置使者領護光武中興皆復內屬至於延光  
三絕三通太宗文皇帝踐漢舊跡竝南山抵葱嶺剖裂  
府鎮煙火相望吐蕃不敢內侮高宗時有司無狀棄四  
鎮不能有而吐蕃遂張入焉耆之西長鼓右驅踰高昌  
歷車師鈔常樂絕莫賀延磧以臨燉煌今孝傑一舉而  
取四鎮還先帝舊封若又棄之是自毀成功而破完策  
也夫四鎮無守胡兵必臨西域西域震則威憺南羌南

羌連衡河西必危且莫賀延磧袤二千里無水草若北接虜唐兵不可度而北則伊西北廷安西諸蕃悉亡議乃格於是首領勃論贊與突厥偽可汗阿史那妥子南侵與孝傑戰冷泉敗走碎葉鎮守使韓思忠破泥孰沒斯城證聖元年欽陵贊婆攻臨洮孝傑以肅邊道大總管戰素羅汗山虜敗還又攻涼州殺都督遣使者請和約罷四鎮兵求分十姓地武后詔通泉尉郭元振往使道與欽陵遇元振曰東贊事朝廷誓好無窮今猥自絕

歲擾邊父通之子絕之孝乎父事之子叛之忠乎欽陵曰然然天子許和得罷二國戍使十姓突厥四鎮各建君長俾其國自守若何元振曰唐以十姓四鎮撫西土為列國主道非有它且諸部與吐蕃異久為唐編人矣欽陵曰使者意我規削諸部為唐邊患邪我若貪土地財賦彼青海湟川近矣今舍不爭何哉突厥諸部磧漠廣莽去中國遠甚安有爭地萬里外邪且四夷唐皆臣并之雖海外地際靡不磨滅吐蕃適獨在者徒以兄弟

小心得相保耳十姓五咄陸近安西於吐蕃遠俟斤距  
我裁一磧騎士騰突不易旬至是以爲憂也烏海黃河  
闊源阻奧多癘毒唐必不能入則弱甲辱將易以爲蕃  
患故我欲得之非閼諸部也甘涼距積石道二千里其  
廣不數百狹纔百里我若出張掖玉門使大國春不耕  
秋不獲不五六可斷其右今棄不爲亦無虞于我矣  
青海之後黃仁素約和邊守不戒崔知辯徑俟斤掠我  
牛羊萬計是以求之使使者固請元振固言不可許后

從之欽陵專國久常居中制事諸弟皆領方面兵而贊婆專東境幾三十年為邊患兄弟皆才略沈雄衆憚之器弩悉美既長欲自得國漸不平乃與大臣論嚴等圖去之欽陵方提兵居外贊普託言獵即勒兵執其親黨二千餘人殺之發使者召欽陵贊婆欽陵不受命贊普自討之未戰欽陵兵潰乃自殺左右殉而死者百餘人贊婆以所部及兄子莽布支等數塞遣羽林飛騎迎勞擢贊婆特進輔國大將軍歸德郡王莽布支左羽林大

將軍安國公皆賜鐵券禮尉良厚贊婆即領部兵戍河  
源死贈安西大都護又遣左肅政臺御史大夫魏元忠  
為隴右諸軍大總管率隴右諸軍大使唐休璟出討方  
虜攻涼州休璟擊之斬首二千級於是論彌薩來朝請  
和贊普自將萬騎攻悉州都督陳大慈四戰皆克明年  
乃獻馬黃金求昏而虜南屬帳皆叛贊普自討死于軍  
諸子爭立國人立棄隸縮贊為贊普始七歲使者來告  
喪且求盟又使大臣悉董熱固求昏未報會監察御史

李知古建討姚州蠻削吐蕃鄉道詔發劍南募士擊之  
蠻酋以情輸虜殺知古尸以祭天進攻蜀漢詔靈武監  
軍右臺御史唐九徵為姚嶲道討擊使率丘擊之虜以  
鐵炬染漾濞二水通西洱蠻築城戍之九徵毀炬夷城  
建鐵柱於滇池以勒功中宗景龍二年還其昏使或言  
彼來逆公主且習聞華言宜勿遣帝以中國當以信結  
夷狄不許明年吐蕃更遣使者納貢祖母可敦又遣宗  
俄請昏帝以雍王守禮女為金城公主妻之吐蕃遣尚

贊咄名悉臘等逆公主帝念主幼賜錦繡別數萬雜伎  
諸工悉從給龜茲樂詔左衛大將軍楊矩持節送帝為  
幸始平帳飲引羣臣及虜使者宴酒所帝悲涕歔欷為  
赦始平縣罪死皆免賜民繇賦一年改縣為金城鄉曰  
鳳池里曰愴別公主至吐蕃自築城以居拜矩鄯州都  
督吐蕃外雖和而陰衝怒即厚餉矩請河西九曲為公  
主湯沐矩表與其地九曲者水甘草良宜畜牧近與唐  
接自是虜益張雄易入寇玄宗開元二年其相坌達延

上書宰相請載盟文定境於河源焉左散騎常侍解琬  
澆盟帝令姚崇等報書命琬持神龍折言往吐蕃亦遣尚  
欽藏御史名悉臘獻載辭未及定坌達延將兵十萬寇  
臨洮入攻蘭渭掠監馬楊矩懼自殺有詔薛訥為隴右  
防禦使與王皎等并力擊帝怒下詔自將討之會皎等  
戰武階斬首萬七千獲馬羊無慮二十萬又戰長子豐  
安軍使王海賓戰死乘之虜大敗衆奔突不能去相枕  
藉死洮水為不流帝乃罷行詔紫微舍人倪若水臨按

軍實戰功且弔祭戰亡士敕州縣并瘞吐蕃露犧宰相  
建言吐蕃本以河為境以公主故乃橋河築城置獨山  
九曲二軍距積石二百里今既負約請毀橋復守河如  
約詔可遣左驍衛郎將尉遲瓌使吐蕃慰安公主然小  
小入犯邊無閑歲於是郭知運王君奐相繼節度隴右  
河西以扞之吐蕃遣宗俄因子到洮水祭戰死士且請  
和然恃盛彊求與天子敵國語悖傲使者至臨洮詔不  
內金城公主上書求聽脩好且言贊普君臣欲與天子

共署誓刻吐蕃又遣使者上書言孝和皇帝嘗賜盟是時唐宰相豆盧欽望魏元忠李嶠紀處訥等凡二十二人及吐蕃君臣同誓孝和皇帝崩太上皇嗣位脩睦如舊然唐宰相在誓刻者皆歿今宰相不及前約故須再盟比使論乞力等前後七輩往未蒙開許且張玄表李知古將兵侵暴甥國故違誓而戰今舅許湔貸前惡歸於大和甥既堅定然不重盟為未信要待新誓也甥自總國事不牽于下欲使百姓久安舅雖及和而意不專

於言何益又言舅責乞力徐集兵且兵以新故相代非  
集也往者疆場自白水皆為閼壤昨郭將軍屯兵而城  
之故甥亦城假令二國和以迎送有如不通因以守境  
又疑與突厥骨咄祿善者舊與通聘即日舅甥如初不  
與交矣因奉寶瓶梧以獻帝謂昔已和親有成言曩前  
盟可矣不許復誓禮其使而遣且厚賜贊普自是歲朝  
貢不犯邊十年攻小勃律國其王沒謹忙詣書北廷節  
度使張孝嵩曰勃律唐西門失之則西方諸國皆墮吐

蕃都護圖之孝嵩聽許遣疏勒副使張思禮以步騎四千晝夜馳與謹忙丘夾擊吐蕃死者數萬多取鎧仗馬羊復九城故地始勃律王來朝父事帝還國置綏遠軍以扞吐蕃故歲常戰吐蕃每曰我非利若國我假道攻四鎮爾及是累歲不出兵於是隴右節度使王君奐請深入取償十二年破吐蕃獻俘後二年悉諾羅兵入大斗拔谷遂攻甘州火鄉聚王君奐勒兵避其銳不戰會大雪吐蕃輒凍如積乃踰積石軍趨西道以歸君奐豫

遣謀出塞燒野草皆盡悉諾邏頓大非川無所牧馬死  
過半君奐率秦州都督張景順約齋窮蹕出青海西方  
冰合師乘而度于時虜已踰大非山留輜重疲弱濱海  
君奐縱兵俘以旋時中書令張說以吐蕃出入數十年  
勝負略相當甘涼河鄯之人奉調發困甚願聽其和帝  
方寵君奐不聽未幾悉諾邏恭祿燭龍莽布支入陷瓜  
州毀其城執刺史田元獻及君奐父遂攻玉門軍圍常  
樂不能拔回寇安西副都護趙頤貞擊却之會君奐為

回紇所殺功不遂帝乃用蕭嵩為河西節度使左金吾將軍張守珪瓜州刺史復城之嵩縱反間殺悉諾羅恭祿明年大將悉末朗攻瓜州守珪擊走之鄯州都督張志亮又戰青海西破大莫門城焚橐它橋隴右節度使杜賓客以彊弩四千射虜破之祁連城下斬副將一上級五千首虜敗慟而走山又明年守珪率伊沙等州兵破虜大同軍又信安王禕出隴西拔石堡城即之置振武軍獻俘於廟帝以書賜將軍裴旻曰敢有掩戰功不

及賞者士自陳將吏皆斬戰有逗留舉隊如軍法能擒  
其王者授大將軍於是士益奮吐蕃令曩骨委書塞下  
言論莽熱論泣熱皆萬人將以贊普命謝都督刺史二  
國有舅甥好昨彌不弄羌黨項交搆二國故失懼此不  
聽唐亦不應聽都督遣腹心吏與曩骨還議盟事曩骨  
猶干牛官也於是忠王友皇甫惟明並言約和便帝曰  
贊普向上書悖慢朕必滅之母議和惟明曰昔贊普幼  
是必邊將好功之人為之以激怒陛下且二國交惡必

興師師興則隱盜財利詐功級希陛下過賞以甘心焉  
今河西隴右貲耗力窮陛下幸詔金城公主許贊普約  
以絳邊患息民之上策也帝采其言敕惟明及中人張  
元方往聘以書賜公主惟明見贊普言天子意贊普大  
喜因悉出貞觀以來書詔示惟明厚饋獻使名悉臘隨  
使者入朝奉表言甥先帝舅顯親也曩為張玄表李知  
古交鬪遂成大釁甥以文成金城公主敢失禮乎特以  
沖幼枉為邊將謾亂如蒙澄亮死且萬足千萬歲不敢

先負盟且獻怪寶使者至帝御前殿列羽林仗內之悉  
臘畧通華文既宴與語禮甚厚賜紫服金魚悉臘受服  
辭魚曰國無是不敢當帝遣御史大夫崔琳報聘吐蕃  
又請交馬於赤嶺互市於甘松嶺宰相裴光庭曰甘松  
中國阻不如許赤嶺乃聽以赤嶺為界表以大碑刻約  
其上又請五經敕祕書寫賜并遣工部尚書李嵩往聘  
賜物萬計吐蕃遣使謝且言唐吐蕃皆大國今約和為  
久長計恐邊吏有妄意者請以使人對相曉敕令昭然

具知帝又令金吾將軍李佺監赤嶺樹碑詔張守珪與  
將軍李行禕吐蕃使者莽布支分諭劍南河西州縣曰  
自今二國和好無相侵暴乃使悉諾勃海納貢并以幣  
器徧遺執政明年上寶器數百具制治詭殊詔置提象  
門示羣臣其後吐蕃西擊勣律勣律告急帝諭令罷兵  
不聽卒殘其國於是崔希逸為河西節度使鎮涼州故  
時疆畔皆樹壁守捉希逸謂虜戍將乞力徐曰兩國約  
好而守備不廢云何請皆罷以便人乞力徐曰公忠誠

無不可恐朝廷未皆信脫掩吾不備其可悔希逸固邀  
乃許即共刑白犬盟而後悉撤障壁虜畜牧被野明年  
僕史孫誨奏事妄言虜無備可取也帝采之詔內豎趙  
惠琮共往按狀小人欲徼幸至涼州因共矯詔詔希逸  
發兵襲破吐蕃青海上斬獲不貲乞力徐遁走吐蕃惠  
不朝二十六年大入河西希逸拒破之鄯州都督杜希  
望又拔新城更號威戎軍希逸顧失信悒悒悵恨召拜  
河南尹既而與惠琮俱見犬崇疑而死誨亦及它誅蕭

昊代為河西節度留後杜希望隴右節度留後王昱劍南節度使分道經畧碎赤嶺碑希望發鄆州兵奪虜河橋竝河築鹽泉城號鎮西軍破吐蕃兵三萬昱以劍南兵入攻安戎城築二小壘左右之兵次蓬婆嶺輸劍南粟餉軍吐蕃悉銳來救昱大敗小壘皆沒士死凡數萬昱貪妄非將選故敗敗死高要明年吐蕃攻白草安人軍詔臨洮朔方分援虜絕臨洮道白水軍使高東于拒守虜引去昊遣將追尾有雲出軍上白兔舞大破吐蕃

昌之敗以張宥代節度劍南以章仇兼瓊為益州司馬  
宥文吏不知兵委事兼瓊兼瓊因得入奏天子果其議  
拔兼瓊代宥節度兼瓊謀誘吐蕃安戎城主為應道官  
軍入盡殺虜戍以監察御史許遠守之吐蕃圍安戎絕  
水泉會石裂泉湧虜驚引去復攻維州不得志詔乃改  
安戎曰平戎云是歲金城公主薨明年為發哀吐蕃使  
者朝因請和不許虜乃悉衆四十萬攻承風堡抵河源  
軍西入長寧橋安仁軍渾崖烽騎將藏希液以銳兵五

千破之吐蕃又襲廓州敗一縣屠吏人攻振武軍石堡城蓋嘉運不能守天寶元年隴右節度使皇甫惟明破虜大嶺軍戰青海破莽布支斬首三萬級明年破洪濟城戰石堡不克副將諸葛諭死之又明年惟明破虜獻俘京師帝以哥舒翰節度隴右翰攻克石堡更號神武軍又禽其相兀論樣郭十載安西節度使高仙芝俘大酋以獻是時吐蕃與蠻閻羅鳳聯兵攻瀘南劍南節度使楊國忠方以姦罔上自言破蠻衆六萬於雲南拔故

洪州等三城獻俘口哥舒翰破洪濟大莫門諸城收九  
曲故地列郡縣實天寶十二載於是置神策軍於臨洮  
西澆河郡於積石西及宛秀軍以實河曲後二年蘇毗  
子悉諾羅來降封懷義王賜姓李氏蘇毗彊部也是歲  
贊普乞黎蘇籠臘贊死子湟悉籠臘贊嗣遣使者脩好  
詔京兆少尹崔光遠持節卽齋冊弔祠還而安祿山亂哥  
舒翰悉河隴兵東守潼闕而諸將各以所鎮兵討難始  
號行營邊候空虛故吐蕃得乘隙暴掠至德初取嵩州

及威武等諸城入屯石堡其明年使使來請討賊且修  
好肅宗遣給事中南巨川報聘然歲內侵取廓霸岷等  
州及河源莫門軍使數來請和帝雖審其譖姑務絃患  
乃詔宰相郭子儀蕭華裴遵慶等與盟寶應元年陷臨  
洮取秦成渭等州明年使散騎常侍李之芳太子左庶  
子崔倫往聘吐蕃留不遣破西山合水城明年入大震  
關取蘭河鄯洮等州於是隴右地盡亡進圍涇州入之  
降刺史高暉又破邠州入奉天副元帥郭子儀禦之吐

蕃以吐谷渾党項兵二十萬東略武功渭北行營將呂  
日將戰懿州西破之又戰終南日將走代宗幸陝儀  
退趨商州高暉導虜入長安立廣武王承宏為帝改元  
擅作赦令署官吏衣冠皆南奔荆襄或逋棲山谷亂兵  
因相攘鈔道路梗閉光祿卿殷仲卿率千人壁藍田選  
二百騎度滻或給虜曰郭令公軍且來吐蕃大震會少  
將王甫與惡少年伐鼓譟苑中虜驚駛夜引去子儀入長  
安高暉東奔至潼關守將李日越殺之吐蕃留京師十

五日乃走天子還京吐蕃退圍鳳翔節度使孫志直拒  
守鎮西節度使馬璘以千騎戰郤之吐蕃屯原會成渭  
間自如也是歲南入松維保等州及雲山新籠城明年  
還使人李之芳等劍南嚴武破吐蕃南鄙兵七萬拔當  
狗城會僕固懷恩反自靈武遣其將范志誠任敷合吐  
蕃吐谷渾兵攻邠州白孝德郭晞嬰壘守乃入居奉天  
西子儀入奉天按軍不戰郭晞以銳士夜擣其營斬首  
數千級奪馬五百取四將吐蕃引去是時嚴武拔鹽州

又戰西山取其衆八萬虜圍涼州河西節度使楊志烈  
不能守跳保甘州而涼州亡永泰元年吐蕃請和詔宰  
相元載杜鴻漸與虜使者同盟懷恩不得志導虜與回  
紇黨項羌渾奴刺犯邊吐蕃大酋尚結息贊摩尚息東  
贊等衆二十萬至醴泉奉天邠將白孝德不能亢任敷  
以兵略鳳翔盩厔於是京師戒嚴朔方兵馬使渾日進  
孫守亮屯奉天詔子儀以河中兵屯涇陽李忠臣屯東  
渭橋李光進屯雲陽馬璘郝廷玉屯便橋駱奉先李日

越屯懿厓李抱玉屯鳳翔周智光屯同州杜冕屯坊州  
天子自率六軍屯于苑吐蕃逼奉天日進以單騎馳之  
士二百踵進左右擊刺射皆應弦仆虜大驚辟易日進  
挾虜一將躍出舉軍望而譟士還無一矢著身者明日  
虜薄城日進發機石勁弩故兵多死凡三日虜斂軍入  
壁日進知虜曲折即夜斫其營斬千餘級生禽五百又  
戰馬嵬凡七日破賊萬人斬首五千獲馬橐它幟械甚  
衆帝欲自討賊下詔大擩馬京師始置團練都人震擾

鑿垣亡去者十八詔中人戶都門不能止吐蕃游騎四  
百略武功鎮西節度使馬璘使健士五十擊之殲士氣  
益奮虜徒營九嵒之陰掠醴泉居人數萬焚室廬田皆  
赤地周智光與虜戰澄城破之吐蕃至邠北復與回紇  
合還攻奉天抵馬嵬任敷以兵五千掠白水殘同州於  
是城中渭橋鄴以屯兵會懷恩死虜謀無主遂與回紇  
爭長回紇怒詣子儀請擊吐蕃自效子儀許之使白元  
光合兵攻吐蕃於靈臺西大破之降僕固名臣帝乃班

師

唐書卷二百十六上

欽定四庫全書  
舊要卷五千三百五十八

史部

唐書卷二百十六下

宋 端 明 殿 學 士 宋 祁 撰

列傳第一百四十一下

吐蕃

永泰大厯間再遣使者來聘於是戶部尚書薛景仙往報詔宰相與吐蕃使者盟俄寇靈州掠宜祿郭子儀精甲三萬戍涇陽入屯奉天靈州兵破虜二萬上級五百

首景仙與論泣陵偕來請境鳳林闕而路悉等十五人  
又來三年虜引衆十萬復攻靈州略邠州先是尚悉結  
自寶應後數入邊以功高請老而贊磨代之為東面節  
度使專河隴邠寧馬璘朔方將白元光再破其衆獲馬  
羊數千劍南亦破虜萬人尚悉摩復來朝天子以虜數  
入塞詔治守障徙當悉柘靜恭五州皆據險以守八年  
虜六萬騎侵靈州敗民稼進寇涇邠渾瑊與戰不利副  
將死略數千戶瑊整卒夜襲其營涇原馬璘以兵掩之

潘原射豹皮將死軍中哭乃遁去璘收所俘士及男女而還郭子儀又破其衆十萬九年帝遣諫議大夫吳損脩好虜亦使使者入朝於是子儀屯邠州李抱玉屯高壁馬璘屯原州李忠臣屯涇州李忠誠屯鳳翔臧希讓屯渭北備虜之入明年西川節度使崔寧破虜於西山虜攻臨涇隴州次普潤焚掠人畜與抱玉戰義寧破之道涇州璘尾追敗之於百里又明年崔寧破虜故洪節度氏蠻黨項等兵斬首萬級禽酋領千人牛羊廩鎧甚

衆獻之朝吐蕃不得志入掠黎雅於是劍南兵合南詔與戰破之禽大籠官論器然又侵坊州取党項牧馬崔寧攻望漢城破之山南西道節度使張獻恭戰岷州吐蕃走寧破西山三路及印南兵斬首八千級十三年虜大酋馬重英以四萬騎寇靈州塞漢御史尚書三渠以擾屯田為朔方留後常謙光所逐重英殘鹽慶而去乃南合南詔衆二十萬攻茂州略扶文遂侵黎雅時天子已發幽州兵馳拒虜大奔破初虜使數至留不遣所俘

虜口悉部送江南德宗即位先內靖方鎮顧歲與虜確  
其亡獲相償欲以德綏懷之遣太常少卿韋倫持節歸  
其俘五百厚給衣褚切敕邊吏護亭障無輒侵虜地吐  
蕃始聞未信使者入境乃皆感畏是時乞立贊為贊普  
姓戶盧提氏曰我乃有三恨不知天子喪不及弔一也  
山陵不及賻二也不知舅即位而發兵攻靈州入扶文  
侵灌口三也即發使者隨倫入朝帝又遣倫還蜀俘虜  
以倫再至歡甚授館作聲樂九日留以論欽明思等五

十人從獻方物明年殿中少監崔漢衡往使贊並猥曰我與唐舅甥國詔書乃用臣禮卑我又請雲州西盡賀蘭山為吐蕃境邀漢衡奏天子乃遣入蕃使判官常魯與論悉詣羅入朝道贊普語且引景龍詔書曰唐使至甥先與盟蕃使至舅亦將親盟贊普曰其禮本均帝許之以獻為進賜為寄領取為領之以前宰相楊炎不通故事為解并約地於賀蘭其大相尚悉結嗜殺人以劍南之敗未報不助和議次相尚結贊有謀固請休息邊

人贊普卒用結贊為大相乃講好漢衡與其使高頰贊  
偕來約盟境上拜漢衡鴻臚卿以都官員外郎樊澤為  
計會使與結贊約且告隴右節度使張鎰同盟澤與結  
贊約盟清水以牛馬為牲鑑欲末其禮乃給結贊曰唐  
非牛不田蕃非馬不戰請用犬豕羊結贊聽諾將盟乃  
除地為壇約二國各以二千士列壇外冗從立壇下鑑  
與幕府齊映齊抗鴻臚漢衡計會使于頔及澤魯皆朝  
服結贊與論悉頰藏論臧執論利陀論力徐等對升壇

刑牲壇北雜其血以進約唐地涇州右盡彈筭陝隴州  
右極清水鳳州西盡同谷劒南盡西山大度水吐蕃守  
鎮蘭渭原會西臨洮東成州抵劒南西磨些諸蠻大度  
水之西南盡大河北自新泉軍抵大磧南極賀蘭橐它  
嶺其間為閑田二國所棄戍地毋增兵毋創城堡毋耕  
邊田既盟請鑑詣壇西南隅浮屠幄為誓於是升壇大  
享獻酬乃還帝命宰相尚書與虜使者盟長安而清水  
之約疆場不定復令漢衡決於贊普乃克盟於是宰相

李忠臣盧杞關播崔寧工部尚書喬琳御史大夫于頴  
太府卿張獻恭司農卿段秀實少府監李昌夔京兆尹  
王翊金吾衛大將軍渾瑊與區頰贊等同盟京城之右  
郊禮如清水前二月告廟齊三日關播跪讀載書已盟  
乃大享詔左僕射李揆為入蕃會盟使還區頰贊等朱  
泚之亂吐蕃請助討賊詔右散騎常侍于頴持節慰撫  
太常少卿沈房為安西北廷宣慰使以報之渾瑊用論  
莽羅兵破泚將韓旻於武亭川初與虜約得長安以涇

靈四州界之會大疫虜輒引去及泚平責先約求地天  
子薄其勞第賜詔書償結贊莽羅等帛萬匹於是虜以  
爲怨貞元二年詔倉部郎中趙建往使而虜已犯涇隴  
邠寧掠人畜敗田稼內州皆閉壁游騎至好畤左金吾  
將軍張獻甫神策將李昇曇等屯咸陽河中渾瑊華州  
駱元光援之以左監門將軍康成使焉尚結贊屯上砦  
原亦令使論乞陀來請盟鳳翔李晟遣部將王佖以銳  
兵三千夜入汧陽明日薄其中軍虜驚潰走結贊僅自

脫虜衆二萬侵鳳翔李晟擊却之因襲破摧沙堡燒儲  
廈斬守者吐蕃攻鹽夏刺史杜彥光拓拔乾暉不能守  
悉其衆南奔虜遂有其地天子以邊人殘沒下詔避正  
殿痛自咎詔駱元光經略鹽夏三年命左庶子崔幹李  
鋗踵使結贊得鹽夏皆戍以兵乃自屯鳴沙然饋餉數  
困於是駱元光韓游瓌濱塞而屯馬燧次石州跨河相  
犄角結贊大懼屢請盟天子不許即以貴將論頰熱厚  
賂乞和於燧燧以為情身入見天子諸將以燧入皆守

壁不戰結贊遽還走馬多死士不能步有饑色漸始至鳴沙傳詔讓結贊破約陷鹽夏對曰本以武亭功未償乃來又候碑仆疆場不明故行境上涇州乘城自保鳳翔李令不納吾使雖康成等來皆不能致委曲我日望大臣而卒無至者我故引還鹽夏守將懼吾衆以城丐我非我敢攻也若天子復許盟虜之願也唯所命當以鹽夏還唐又言清水盟大臣少故約易壞請悉遣宰相元帥二十一人會盟并言靈鹽節度使杜希全涇原節

度使李觀外蕃所信請主盟帝復使幹報結贊曰希全  
守靈州有分地不可以越境觀既徙官以渾瑊為明會  
使約五月盟清水使先效二州以驗虜信結贊辭清水  
非吉地請會原州之土梨樹乃歸二州天子從之瑊來  
受命拜漢衡兵部尚書以副瑊瑊率師二萬待期詔駱  
元光助之辛相議所盟地左神策將馬有鄰建言土梨  
樹林薈巖阻兵易詭伏不如平涼夷漫坦直且近涇緩  
急可保也乃定盟平涼城約結贊主客均以兵三千至

壇外誕從四百叩壇以游軍交邏相入將盟結贊伏精  
騎三萬于西縱邏騎出入瑊軍瑊將梁奉貞亦駿馬入  
虜軍營陰執之而瑊不知也客請瑊等具冠劍皆就幄  
更衣從容胖肆虜忽三伐鼓衆譟而興瑊不知所出走  
幄後得馬不銜而馳十里始得銜虜追矢若雨不傷也  
至元光營乃脫裨將辛榮兵數百據北阜與虜戰矢盡  
乃降判官韓弁監軍宋鳳朝死之漢衡與判官鄭叔矩  
路泌掌書記袁同直列將扶餘準馬寧孟日華李至言

樂演明范澄馬弇中人劉延邕俱文珍李朝清等六十  
人皆被執士死者五百生獲者千餘人漢衡語虜曰我  
崔尚書也結贊與我善若殺我結贊亦殺若乃不死人  
負一木以繩三約之係其髮驅之夜則杙地繫而仆蒙  
以罽守者寢其上始結贊將劫希全觀急以銳兵直趣  
京師既不克又欲禽瑊等擣虛入寇其謀本然既引去  
至故原州坐帳中見漢衡等慢言渾瑊戰武亭我力也  
許梨地償我而自食其言吾既作金枷將必得瑊以見

贊普乃今失之徒致公等無益也當使人歸報初漢衡  
遇亂從史呂溫身蔽丘溫傷而漢衡脫虜人嘉其義厚  
給養之結贊屯石門以俱文珍馬寧馬弁歸唐而囚漢  
衡叔矩河州辛榮廓州扶餘淮鄯州帝猶使中人齎詔  
書賜結贊拒不受虜戍鹽夏涉春疫大興皆思歸結贊  
以騎三千迎之火二州廬舍頽鄂堞而去杜希全分兵  
保之帝哀漢衡等陷辱下詔賜其子七品官叔矩泌弁  
曰華榮志信澄良貢演明一子八品官袁同直而下一

子九品官以決勝軍使唐良臣屯潘原神策將蘇太平  
屯隴州結贊召漢衡日華延邕至石門以五騎送境上  
遣使者奉表來李觀曰有詔不內吐蕃使者受漢衡等  
放其使結贊以羌渾衆屯潘口傍青石嶺三分其兵趨  
隴汧陽間連營數十里中軍距鳳翔一舍詭漢服號邢  
君牙兵入吳山寶鷄焚聚落略畜牧丁壯殺老孺斷手  
剔目乃去李晟嘗斸大木塞安化隘處虜過悉焚之詔  
神策將石季章壁武功良臣移師百里城虜又剽汧陽

華亭男女萬人以畀羌渾將出塞令東向辭國衆慟哭  
投塹谷死者千數吐蕃又入豐義圍華亭絕汲道守將  
王仙鶴請救於隴州刺史蘇清沔合太平兵赴之虜逆  
戰太平不勝引還虜日千騎四掠隴兵不敢出虜積薪  
將焚華亭仙鶴以衆降清沔潛兵大象龕夜半約城中  
舉火燭天虜衆驚因襲其營乃去更攻連雲堡飛石投  
市井皆滿為虛梁絕塹而升守將張明遠降于虜虜分  
捕山間亡人及牛羊率萬計涇隴邠之民蕩然盡矣諸

將曾不能得一俘但賀賊出塞而已連雲堡涇要地也  
三垂峭絕北據高虜所進退候火易通既失之城下即  
虜境每爇稼必陳兵于野故多失時是歲三州不宿麥  
虜數千騎犯長武城城使韓全義拒之韓游瓊兵不出  
於是虜安行邠涇間諸屯西門皆閉虜治故原州保之  
帝取所獲吐蕃生口不二百狗諸市以安京師四年五  
月虜三萬騎略涇邠寧慶鄜五州之鄙焚吏舍民闇係  
執數萬韓全義以陳許兵戰長武無功初吐蕃盜塞畏

春夏疾疫常以盛秋及是得唐俘多厚給產質其孥故  
盛夏入邊尚悉董星論莽羅等又寇寧州張獻甫拒斬  
裁百級轉剽鄜坊乃去五年韋臯以劍南兵戰臺登殺  
虜將乞臧遮遮悉多楊朱西南少安不三年盡得雋州  
地久之北廷沙陀別部叛吐蕃因是陷北廷都護府安  
西道絕獨西州人尚為唐守八年寇靈州陷水口塞營  
田渠發河東振武兵合神策軍擊之虜引還又寇涇州  
掠田軍千人守捉使唐朝臣戰不利山南西道節度使

嚴震破虜于芳州取黑水壁焚積聚自虜得鹽州塞防  
無以障遏而靈武單露鄜坊侵迫寇日以驕數入為邊  
患帝復詔城之使涇原劖南山深入窮討分其兵母  
令專向東方詔朔方河中晉絳邠寧兵馬副元帥渾瑊  
朔方靈鹽豐夏綏銀節度都統杜希全邠寧節度使張  
獻甫右神策軍行營節度使邢君牙夏綏銀節度使韓  
潭鄜坊丹延節度使王栖曜振武麟勝節度使范希朝  
合兵三萬以左神策將軍胡堅右神策將軍張昌為鹽

州行營節度使板築之役者六千人餘皆陳城下九年始裁閱二旬訖功而虜兵不出遂以兼御史大夫紇于遂與兼中丞杜彥光戍之當是時韋臯功最多破堡壁五十餘所敗其南道元帥論莽熟沒籠乞悉範又與南詔破之于神川于鐵橋臯俘馘三萬降首領論乞鬚湯沒藏悉諾碑十二年寇慶州及華池殺略吏人是歲尚結贊死明年贊普死其子足之前立邢君牙築永信城于隴州以備虜虜使者農桑昔來請脩好朝廷以其無

信不受章臯取新城虜治劔山馬嶺進寇臺登雋州刺  
史曹高仕擊郤之禽籠官斬級三百獲馬糧械數千十  
四年韓全義破虜于鹽州十六年靈州破虜于烏蘭橋  
章臯拔末恭顯二城十七年寇鹽州陷麟州殺刺史郭  
鋒涇隍墮陴係居人掠党項諸部屯橫槽烽虜將徐舍  
人者語俘道人延素曰我乃司空英公裔孫也武后時  
家祖以兵尊王室不克子孫奔播絕域今三世矣我雖  
握兵心未嘗忘歸也顧不能自拔耳陰使延素夜逸又

言吾按邊求資糧至麟而守者無備遂入之知郭使君  
勲臣家欲全安之不幸死亂兵語方已會飛鳥使至召  
其軍還遂引去飛鳥猶傳騎也韋臯出西山與虜戰破  
之雅州籠官馬定德本虜之知兵有策慮者周知山川  
險易每用兵常馳驛計議授諸將以行比年寇黎雋臯  
常折其兵定德畏得罪遂來降因定昆明諸蠻吐蕃以  
下屢叛大侵靈州時臯圍維州贊普使論莽熟沒籠乞  
悉訖兼松州五道節度兵馬都統羣牧大使引兵十萬

援維州臯率南詔兵薄險設伏以待纔使千人嘗敵乞  
悉蓖見兵寡悉衆追墮伏中兵四合急擊遂禽之獻京  
師明年吐蕃使者論頰執熟復來右龍武大將軍薛伾往  
報二十年贊普死遣工部侍郎張薦弔祠其弟嗣立再  
使使者入朝順宗立以左金吾衛將軍田景度庫部員  
外郎熊執易持節往使永貞元年論乞縷勃藏歸金幣  
馬半助崇陵有詔陳太極廷中憲宗初遣使者脩好且  
還其俘又以使告順宗喪吐蕃亦以論勃藏來後比年

來朝然以五萬騎入振武拂鶴泉萬騎至豐州大石谷  
鈔回鶻還國者五年以祠部郎中徐復往使并賜鉢闡  
布書鉢闡布者虜浮屠豫國事者也亦曰鉢掣逋復至  
鄯州擅還其副李逢致命贊普復坐貶虜以論思邪熱  
入謝且歸鄭叔矩路泌之枢因言願歸秦原安樂州詔  
宰相杜佑等與議中書論思邪熱拜于廷佑答拜堂上  
復以鴻臚少卿李銘丹王府長史吳暉報之自是朝貢  
歲入又款隴州塞丐互市詔可十二年贊普死使者論

乞鬚來以右衛將軍烏重玘殿中侍御史段鈞弔祭之  
可黎可足立為贊普重玘以扶餘準李駿偕歸準東明  
人本朔方騎將駿隴西人貞元初戰沒于虜者使者知  
不死求之乃得還詔以準為澧王府司馬駿嘉王友吐  
蕃使論矩立藏來朝未出境吐蕃寇宥州與靈州兵戰  
定遠城虜不勝斬首二千級平涼鎮遏使郝玼又破虜  
兵二萬夏州節度使田縉破其衆三千詔留矩立藏等  
不遣劖南兵拔峨和栖鷄城十四年乃歸矩立藏等吐

蕃節度論二摩宰相尚塔藏中書令尚綺心兒總兵十五萬圍鹽州為飛梯鷲車攻城刺史李文悅拒之城壞輒補夜襲其營晝出戰破虜萬人積三旬不能拔朔方將史敬奉以奇兵繞出虜背大破之解圍去始沙州刺史周彊為唐固守贊普徙帳南山使尚綺心兒攻之彊請救回鶻踰年不至議焚城郭引衆東奔皆以為不可彊遣都知兵馬使閻朝領壯士行視水草晨入謁辭行與彊親吏周沙奴共射彀弓揖讓射沙奴即死執彊而

縊殺之自領州事城守者八年出綾一端募麥一斗應  
者甚衆朝喜曰民且有食可以死守也又二歲糧械皆  
竭登城而諱曰苟毋徙它境請以城降綺心兒許諾於  
是出降自攻城至是凡十一年贊普以綺心兒代守後  
疑朝謀變置毒韓中而死州人皆胡服臣虜每歲時祀  
父祖衣中國之服號慟而藏之穆宗即位遣祕書少監  
田洎往告使者亦來虜引兵入屯靈武靈州兵擊却之  
又犯青塞烽進寇涇州瀕水而營綿五十里始泊至牙

虜欲會盟長武洎含糊應之至是顯言洎許我盟我是以來逼涇一舍止詔右軍中尉梁守謙為左右神策軍京西北行營都監發卒合八鎮兵援涇州貶洎郴州司戶參軍以太府少卿邵同持節為和好使初夏州田縉裒皆黨項怨之導虜入鈔郝玼與戰多殺其衆李光顏又以邠兵至乃引去復遣使者來南略雅州詔方鎮與虜接者謹備邊長慶元年聞回鶻和親犯清塞堡為李文悅所逐乃遣使者尚綺力陀思來朝且乞盟詔許之

崔植杜元穎王播輔政議欲告廟禮官謂肅宗代宗皆  
嘗與吐蕃盟不告廟德宗建中之盟將重其約始詔告  
廟至會平涼不復告殺之也乃止以大理卿劉元鼎爲  
盟會使右司郎中劉師老副之詔宰相與尚書右僕射  
韓臯御史中丞牛僧孺吏部尚書李絳兵部尚書蕭俛  
戶部尚書楊於陵禮部尚書韋綬太常卿趙宗儒司農  
卿裴武京兆尹柳公綽右金吾將軍郭鏕及吐蕃使者  
論訥羅盟京師西郊贊普以盟言約二國無相寇讐有

禽生問事給服糧歸之詔可大臣豫盟者悉載名於策  
方盟時吐蕃以壯騎屯曾州靈州節度使李進誠與戰  
大石山破之虜遣使者趙國章來且致宰相信幣明年  
請定疆候元鼎與論訥羅就盟其國敕虜大臣亦列名  
于策元鼎踰成紀武川抵河廣武梁故時城郭未墮蘭  
州地皆杭猶桃李榆柳岑蔚戶皆唐人見使者靡蓋夾  
道觀至龍支城耆老千人拜且泣問天子安否言頃從  
軍沒于此今子孫未忘唐服朝廷念之乎兵何日

來言已皆嗚咽密問之豐州人也過石堡城崖壁峭豎  
道回屈虜曰鐵刀城右行數十里土石皆赤虜曰赤嶺  
而信安王禕張守珪所定封石皆仆獨虜所立石猶存  
赤嶺距長安三千里而贏蓋隴右故地也曰悶恒盧川  
直羅娑川之南百里臧河所流也河之西南地如砥原  
野秀沃夾河多檉柳山多栢坡皆丘墓旁作屋顏塗之  
繪白虎皆虜貴人有戰功者生衣其皮死以旌勇殉死  
者瘞其旁度悉結羅嶺鑿石通車逆金城公主道也至

麋谷就館臧河之北川贊普之夏牙也周以槍罿率十  
步植百長槊中刺大幟為三門相距皆百步甲士持門  
巫祝鳥冠虎帶擊鼓凡入者搜索乃進中有高臺環以  
寶楯贊普坐帳中以黃金飾蛟螭虎豹身被素褐結朝  
霞冒首佩金鏤劔鉢制手通立于右宰相列臺下唐使者  
始至給事中論悉答熱來議盟大享於牙右飯舉酒行  
與華制略等樂奏秦王破陣曲又奏涼州胡渭錄要雜  
曲百伎皆中國人盟壇廣十步高二尺使者與虜大臣

十餘對位酋長百餘坐壇下上設巨榻鉢掣逋升告盟  
一人自旁譯授于下已歃血鉢掣逋不歃盟畢以浮屠  
重為誓引鬱金水以飲與使者交慶乃降元鼎還虜元  
帥尚塔藏館客大夏川集東方節度諸將百餘置盟策  
臺上徧曉之且戒各保境毋相暴犯策署夔泰七年尚  
塔藏語元鼎曰回鶻小國我嘗討之距城三日危破會  
國有喪乃還非我敵也唐何所畏乃厚之元鼎曰回鶻  
有功且如約未始妄以兵取尺寸地是以厚之塔藏默

然元舅踰湟水至龍泉谷西北望殺胡川哥舒翰故壁  
多在湟水出蒙谷抵龍泉與河合河之上流繇洪濟梁  
西南行二千里水益狹春可涉秋夏乃勝舟其南三百  
里三山中高而四下曰紫山直大羊同國古所謂崑崙  
者也虜曰悶摩黎山東距長安五千里河源其間流澄  
緩下稍合衆流色赤行益遠它水并注則濁故世舉謂  
西戎地曰河湟河源東北直莫賀延磧尾殆五百里磧  
廣五十里北自沙州西南入吐谷渾寢狹故號磧尾隱

測其地蓋劍南之西元舅所經見大略如此虜遣論悉  
諾息等入謝天子命左衛大將軍令狐通太僕少卿杜  
載荅之是歲尚綺心兒以兵擊回鶻党項小和尚設塔  
率衆三萬牧馬木蘭梁比歲使者獻金盞銀治犀鹿貢  
犂牛寶歷至太和再遣使者朝五年維州守將悉怛謀  
挈城以降劍南西川節度使李德裕受之收符章仗鎧  
更遣將虞藏儉據之州南抵江陽岷山西北望隴山一  
面崖三涯江虜號無憂城為西南要扞會牛僧孺當國

謀還悉怛謀歸其城吐蕃夷誅無遺種以怖諸戎自是  
比五年虜使來必報所貢有玉帶金皿獺褐犧牛尾霞  
罽馬羊橐它贊普立幾三十年病不事委任大臣故不  
能抗中國邊候晏然死以弟達磨嗣達磨嗜酒好畋獵  
喜內且凶復少恩政益亂開成四年遣太子詹事李景  
儒往使吐蕃以論集熱來朝獻玉器羊馬自是國中地  
震裂水泉湧岷山崩洮水逆流三日鼠食稼人饑疫死  
者相枕藉鄆廓間夜聞鼙鼓聲人相驚會昌二年贊普

死論贊熱等來告天子命將作監李璟弔祠無子以妃  
紳兄尚延力子乞離胡為贊普始三歲妃共治其國大  
相結都那見乞離胡不肯拜曰贊普支屬尚多何至立  
紳氏子邪哭而出用事者共殺之別將尚恐熱為落門  
川討擊使姓末名農力熱猶中國號郎也譎詭善幻約  
三部得萬騎擊鄯州節度使尚婢婢略地至渭州與宰  
相尚與思羅戰薄寒山思羅敗走松州合蘇毗吐渾羊  
同兵八萬保洮河自守恐熱謂蘇毗等曰宰相兄弟殺

贊普天神使我舉義兵誅不道爾屬乃助逆背國耶蘇  
毗等疑而不戰恐執麾輕騎涉河諸部先降并其衆至  
十餘萬禽思羅縊殺之婢婢姓沒盧名贊心牙羊同國  
人世為吐蕃貴相寬厚略通書記不喜仕贊普彊官之  
三年國人以贊普立非是皆叛去恐熱自號宰相以兵  
二十萬擊婢婢鼓鼙牛馬橐它聯千餘里至鎮西軍大  
風雷電部將震死者十餘人羊馬橐它亦數百恐熱惡  
之按軍不進婢婢聞之厚幣詔書約驩恐熱大喜曰婢

婢書生焉知軍事我為贊普當以家居宰相處之於是  
退營大夏川婢婢遣將龐結心莽羅薛呂擊恐熱於河  
州之南伏兵四萬結心據山射書極罵恐熱怒甚盛兵  
出鬪結心偽北恐熱追至數十里莽羅薛呂以伏兵東  
擊大風雨河溢溺死甚衆恐熱單騎而逃既不得志尤  
猜忍殺戮部將岌藏豐贊皆降婢婢厚遇之明年恐熱  
復攻鄯州婢婢分兵五道拒守恐熱保東谷山堅壁不  
出岌藏繚以重柵斷汲道旬日恐熱走薄寒山募散卒

稍至得數千人復戰鶻鷗山再戰南谷皆大敗兵鋒仍歲不解大中三年婢婢屯兵河源聞恐熱謀度河急擊之為恐熱所敗婢婢統銳兵扼橋亦不勝焚橋而還恐熱間出鷄頂嶺闖馮破為梁攻婢婢至白土嶺敗其將尚鐸羅榻藏進戰犧牛破婢婢將燭盧鞏力欲負破自固以困恐熱大將磨離罷子不從乃辭疾先歸罷子急擊恐熱一戰而死婢婢糧盡引衆趨甘州西境以拓拔懷光居守恐熱麾下多歸之恐熱大略鄯廓瓜肅伊西

等州所過捕戮積尸狼藉麾下內怨皆欲圖之乃揚聲  
將請唐兵五十萬共定其亂保渭州求冊為贊普奉表  
歸唐宣宗詔太僕卿陸耽持節慰勞命涇原靈武鳳翔  
邠寧振武等兵迎接恐熱至詔尚書左丞李景讓就問  
所欲恐熱倨夸自大且求河渭節度使帝不許還過咸  
陽橋咄歎曰我舉大事覩得濟此河與唐分境於是復  
趨洛門川收散卒將寇邊會久雨糧絕恐熱還奔廓州  
於是鳳翔節度使李玭復清水涇原節度使康季榮復

原州取石門等六關得人畜幾萬靈武節度使李欽取  
安樂州詔為威州邠寧節度使張欽緒復蕭閼鳳翔收  
秦州山南西道節度使鄭淮得扶州鳳翔兵與吐蕃戰  
隴州斬首五百級是歲河隴高年千餘見闕下天子為  
御延喜樓賜冠帶皆爭解辮易服因詔差賜四道兵錄  
有勞者三州七關地腴衍者聽民墾藝貸五歲賦溫池  
委度支榷其鹽以贍邊四道兵能營田者為給牛種戍  
者倍其資餲再歲一代商賈往來於邊者關鎮毋荷留

兵欲墾田與民同初太宗平薛仁果得隴上地虜李軌  
得涼州破吐谷渾高昌開四鎮玄宗繼收黃河磧石宛  
秀等軍中國無斤候警者幾四十年輪臺伊吾屯田禾  
菽彌望開遠門揭侯署曰西極道九千九百里示戍人  
無萬里行也乾元後隴右劍南西山三州七關軍鎮監  
牧三百所皆失之憲宗常覽天下圖見河湟舊封赫然  
思經略之未暇也至是羣臣奏言王者建功立業必有  
以光表於世者今不勤一卒血一刀而河湟自歸請上

天子尊號帝曰憲宗嘗念河湟業未就而殂落今當述祖宗之烈其議上順憲二廟謚號夸顯後世又詔朕姑息民其山外諸州須後經營之明年沙州首領張義潮奉瓜沙伊肅甘等十一州地圖以獻始義潮陰結豪英歸唐一日衆擐甲譟州門漢人皆助之虜守者驚走遂攝州事繕甲兵耕且戰悉復餘州以部校十輩皆操挺內表其中東北走天德城防禦使李丕以聞帝嘉其忠命使者齎詔收慰擢義潮沙州防禦使俄號歸義軍遂

為節度使其後河渭州虜將尚延心以國破亡亦獻款  
秦州刺史高駢誘降延心及渾末部萬帳遂收二州拜  
延心武衛將軍駢收鳳林闕以延心為河渭等州都游  
奕使咸通二年義潮奉涼州來歸七年北廷回鶻僕固  
俊擊取西州收諸部鄯州城使張季顥與尚恐熱戰破  
之收器鎧以獻吐蕃餘衆犯邠寧節度使薛弘宗郤之  
會僕固俊與吐蕃大戰斬恐熱首傳京師八年義潮入  
朝為右神武統軍賜第及田命族子淮深守歸義十三

年卒沙州以長史曹義金領州務遂授歸義節度使後中原多故王命不及甘州為回鶻所并歸義諸城多沒渾末亦曰嘔末吐蕃奴部也虜法出師必發豪室皆以奴從平居散處耕牧及恐熱亂無所歸共相嘯合數千人以嘔末自號居甘肅瓜沙河渭岷廓疊石間其近蕃牙者最勇而馬尤良云

贊曰唐興四夷有弗率者皆利兵移之蹙其牙犁其廷而後已惟吐蕃回鶻號強雄為中國患最久贊普遂盡

盜河湟薄王畿為東境犯京師掠近輔殘馘華人謀夫  
虓帥圖視共計卒不得要領晚節二姓自亡而唐亦衰  
焉夫外撫內寧惟聖人不讓玄宗有逸德而拓地太大  
務遠功忽近虞逆賊一奮中原封裂訖二百年不得復  
完而至陵夷然則內先自治釋四夷為外懼守成之良  
資也

唐書卷二百十六下

唐書卷二百十六下考證

吐蕃傳下馬璘屯原州○舊書作泗中疑誤

貶洎郴州司戶○舊書作柳州

唐書卷二百十六下考證

謹案卷二百十六上第一頁後二行為乞佛熾盤  
所滅案晉書及魏書北史佛俱作伏此仍舊書  
作佛蓋二字音近通用


第二頁前五行或遷娑川案文獻通考及太平寰  
宇記娑作婆與此異

第十頁前四行東與涼松茂雋接刊本脫涼字據

舊書吐蕃傳增

卷二百十六下第七頁後一行誕從四百叩壇案

誕從舊書作散手與此異



總校官庶吉士臣侍朝

校對官庶吉士臣嚴福

謄錄監生臣陸學稼